

Headlines

- प्रधानमंत्री नरेंद्र मोदी होंरें आखेआ जे भारत गी अगले 10एं बरें च आर्थिक तौर पर आत्मनिर्भर बनना होग तां जे आलमी सतह दे हालात दा स्हाड़े देसै पर मता असर नेई होए।
- केंद्री गृह सचिव अजय कुमार भल्ला होंरें मजूदा समें च नमीं तकनीकें करी पैदा होने आहले सुरक्षा खतरें दे प्रति आगाह कीता ऐ।
- जम्मू-कश्मीर दे मुख् चनांऽ अधिकारी पांडुरंग.के पोले होंरें पुंछ जिले च चुनावी तैयारिएं दा व्यापक जायजा लैता तां जे औंदे लोकसभा चुनाएं गी बवस्थित ते रमानदारी आहले ढंगै सिर तोढ चाढेया जाई सकै।
- पुलसा दे डरैक्टर जनरल आर.आर. स्वैन होंरें आखेआ ऐ जे मतदाताएं ते मेदवारें गी चुनांऽ रैलिएं दरान तगड़ी सुरक्षा उपलब्ध करोआई जानी लोडचदी तां जे जम्मू-कश्मीर च चुनांऽ रमानदारी कन्नै करोआए जाई सकन।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

PM-RBI

प्रधानमंत्री नरेंद्र मोदी होंरें आखेआ ऐ जे भारत गी अगले 10एं बरें च आर्थिक तौर पर आत्मनिर्भर बनना होग, तां जे आलमी सतह दे हालात दा स्हाड़े पर मता असर नेई पवै। भारती रिजर्व बैंक दे 90 बरे पूरे होने दे मौके पर मुम्बई च आयोजित समारोह च प्रधानमंत्री होंरें आखेआ जे भारत दे बैंकिंग खेत्तर च बड्डा बदलाव आया ऐ ते एह शोध दा विशे ऐ। उनें आखेआ जे पिच्छले दहाके च उंदी सरकार ते आर.बी.आई आस्सेआ पुट्टी गेदी गैहीं कारण बैंकिंग खेत्तर लाहू आहली स्थिति च ऐ। उनें आखेआ जे सरकारै सार्वजनिक खेत्तर दे बैंकें गी उबडा चुक्कने लेई साड्डे 3 लक्ख करोड़ रुपें दी पूंजी पाई ऐ। उनें आखेआ जे बैंकें दे डुब्बी गेदे दोआर-कर्जे जेह्ड़े 2018 च 11 इशारिया 2-5 फीसद हे, ओहू पिच्छले बरे सितंबर तगर घटियै 3 फीसद शा बी घट्ट रेही गो। उनें आखेआ जे इस किस्मै दिएं उपलब्धिएं च आर.बी.आई नै बड़ी महत्वपूर्ण भूमिका निभाई ऐ। प्रधानमंत्री होर शैहरा दे इक दिनै दे दौरै पर हे। आर.बी.आई नै पैहली अप्रैल 1935 गी कम्म करना शुरू कीता हा।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

Home Secy. BCAS

केंद्री गृह सचिव अजय कुमार भल्ला होंरें मजूदा समें च नमिएं तकनीकें राएं पैदा होने आले सुरक्षा खतरें कोला आगाह करदे होई मता सौहगा ते सतर्क रौहने लेई आखेआ ऐ। अज्ज नमीं दिल्ली च सिविल हवाबाजी सेवाएं सरबन्धी ब्यूरो यानि ब्यूरो ऑफ सिविल एविएशन सर्विसेज दे 38में स्थापना दिवस दे मौके पर भल्ला होंरें आखेआ जे आर्टिफिशियल इंटेलिजेन्स, ग्लोबल पोजीशनिंग सिस्टम जैमिंग ड्रोन ते साइबर खतरे मती परेशानी पैदा करा करदे न। उनें इनें खतरें कोला सुरक्षा यकीनी बनाने लेई सांझे ते सामूहिक जत्तें दी जरूरतै पर जोर भरदे होई ब्यूरो गी नमिएं तकनीकें ते प्रौद्योगिकिएं कन्नै लैस रौहने दा निर्देश बी दित्ता।

&lt;&gt;&lt;&gt;&lt;&gt;&lt;&gt;&lt;&gt;&lt;&gt;

## LGP-Prices

तेल कंपनीं मुख भरै च 19 किलोमीटर आहले कारोबारी एल.पी.जी सलेंडर दे मुल्ल घट्ट करी दित्ते ना। बक्ख-बक्ख शैहरें च 30 शा 32 रपें तगर दी कटौती कीती गई ऐ। दिल्ली च कारोबारी सलेंडर दी कीमत 1 ज्हार 795 रपें शा घट्टियै हुन 1 ज्हार 764 रपे होई गई ऐ। तोआई कोलकाता च एहदी कीमत 1 ज्हार 879, मुम्बई च 1 ज्हार 717 ते चेन्नई च 1 ज्हार 930 रपे होई गई ऐ।

<><><><><><>

## Sheyphali-Sharma

भारती सूचना सेवा दिएं वरिष्ठ अधिकारी शेफाली. बी. शरण होरें अज्ज पत्र सूचना कार्यालय पी.आई.बी दे प्रधान महानिदेशक दा कार्यभार सांभी लैत्ता ऐ। 1990 बैच दिआं आई.आई.एस अधिकारी शेफाली शरण होर मनीष देसाई हुंदे सेवानिवृत्त होने परैंत इस ओहदे पर काबिज़ होइयां ना। शरण होर एहदे शा पैहले चुनांS आयोग ते खजाना मंत्रालय च बी कम्म करी चुकी दिआं ना।

<><><><><><>

## Court-Kejriwal

दिल्ली दी इक अदालतै कथित आकबारी नीति घोटाले कन्नै जुड़े दे काले धनै गी जायज बनाने दे मामले च दिल्ली दे मुखमंत्री ते आम आदमी पार्टी दे नेता अरविंद केजरीवाल होरें गी 15 अप्रैल तगर नयायिक हिरासत च भेजी दित्ता ऐ। माली नियम कायदे लागू करोआने सरबन्धी निदेशालय ई.डी नै केजरीवाल होरें गी जंदी 21 मार्च गी गिरफ्तार कीता हा। ई.डी हिरासत गी अवधि खत्म होने दे बाद केजरीवाल होरें गी अज्ज राउज़ एवेन्यू हेठली अदालत दी विशेष सी.बी.आई जज हुंदे सामने पेश कीता गेआ। एहदे शा पैहले हेठली अदालतै उनें गी 6 दिनें लेई ई.डी. दी हिरासत च भेजेआ हा ते मगरा इस अवधि गी होर 4 दिनें लेई बी बधायी हा। केजरीवाल होर एहदे शा पैहले ई.डी. आस्सेआ भेजे गेदे 9 समन दी अनदिक्खी करी चुके दे हे। आम आदमी पार्टी दे नेता मनीष सिसोदिया ते संजय सिंह बी इस मामले च आरोपी न ते फिलहाल जेल च बंद ना।

<><><><><><>

## Aircraft-Trial Run

जम्मू-श्रीनगर राश्ट्रीय जरनैली शिडकै दे वनपोह कोला लेइए संगम तोड़ी दे हिस्से पर गड्डी दी आओजाई बंद रक्खी गई ऐ। इयां उत्थे इमरजंसी दे हालात दौरान ज्हाज तोआरने दी सुविधा दी अजमैश करने लेई कीता गेआ ऐ। अधिकारिक सूत्रें मुजब कोई साड्डे त्रै किलोमीटर लम्मी, इमरजंसी लैंडिंग आली इस ब्हाई पट्टी दा कम्म 2020 च शुरू होआ हा ते पिछले बरे मुकम्मल कीता गेआ हा। अधिकारिणं दा आखना ऐ जे इस पट्टी दे आले दोआले दे इलाके च सुरक्षा बधाई दिती गेदी ऐ ते बादू बल बी तैनात कीते गे न तां जे लोके दी इस इलाके च आओजाई गी रोकेया जाई सकै। वानपोह थमां संगम तोड़ी जाने आली गड्डी गी बाईपास आहली बक्खी दा लंघाया जा'रदा ऐ।

इस पट्टी पर ज्हाज तोआरने ते डोआरी भरने आहली अजमैश दिने मगरा कीती जाग। इस पट्टी दा इस्तेमाल कुदरती करोपिएं, लड़ाई या कुसै होर आपात स्थिति च कीता जाई सकदा ऐ।

<><><><><><>

### CEO-Poonch

जम्मू-कश्मीर दे मुख् चनां अधिकारी पी.के पोले होरें पुंछ जिले च चुनावी तैयारिएं दा व्यापक जायजा लैता। इस बैठक दा मकसद साज-समेयान सरबंधी बंदोबस्तें, सुरक्षा उपाएं ते चुनावी प्रक्रिया लेई पूरी-पराती तैयारिएं दा आंकलन करना हा।

<><><><><><>

### DGP-BRTC

जम्मू-कश्मीर च बी लोकसभा चनां पूरी चाल्ली रमानदारी ते सुरक्षत ढंगै नै तोड़ चाढने लेई सुरक्षा बंदोबस्त होर तगड़े कीते जा करदे न। पुलस महानिदेशक आर.आर. स्वैन होरें आखेआ ऐ जे चनां रैलिएं च ते मतदान दी प्रक्रिया दौरान मतदाताएं, मेदवारें ते चनां अमले गी आला तकनीक पर आधारित तगड़ी सुरक्षा उपलब्ध कराई जानी लोड़चदी। एस.पी.एस पुलस ट्रेनिंग स्कूल कठुआ च बुनियादी भर्ती सिखलाई कोर्स दे 30में बैच ते दुई महिला बटालियन दी पासिंग आउट परेड आले कार्यक्रम च शामिल होने दे बाद मीडिया कन्नै गल्ल करदे होई डीजीपी होरें इयां आखेआ। जम्मू-कश्मीर दे बक्ख-बक्ख हिस्से थमां भर्ती कीती गेदिएं 922 महिला रंगरूटे गी 10एं म्हीने दी बेहतरिन ट्रेनिंग दिती गेई ऐ जेदे च थेआर चलाना, कमांडो ट्रेनिंग ते कनून नाफस करने ते कनून बवस्था बनाई रखने जनेए कम्में-कारवाइएं दी सिखलाई शामिल ऐ।

<><><><><><>

### Reasi-Basakhi

रियासी जिले च डेरा बाबा बंदा बहादुर थार त्रै रोजा सलाना ऐतिहासिक डेरा बाबा बसाखी उत्सव 12 अप्रैल गी शुरू होग। स्हाड़े जिला संवाददाता देवेन्द्र ठाकुर नै जानकारी दिती ऐ जे कटड़ा कस्बे कोला 28 किलोमीटर ते जिला मुख्यालय रियासी कोला कोई 20 किलोमीटर दे छिंडे पर बाबा डेरा श्री बाबा बंदा बहादुर साहब थाह लगने आले इस उत्सव च हर बरे ज्हारां बदे श्रद्धालु शामिल होने गितै औंदे न। ऐकती इस मौके पर बाबा बंदा बहादुर हुंदे 300 बरे पराने थेआर बी लोकें दे दिक्खने लेई रक्खे जाडन जिंदे च उंदी बड़ी बड़ी तलवार बी शामिल ऐ, जेह्डी उनेंगी श्री गुरु गोबिंद सिंह होरें दिती ही।

<><><><><><>

## NC-Candidate

नेशनल कांफ्रेंस नै अपने वरिष्ठ नेता मियां अल्ताफ अहमद होरें गी अनंतनाग-राजौरी लोकसभा सीट लेई अपना मेदवार घोषित कीता ऐ। पार्टी दे उप-प्रधान उमर अब्दुल्ला होरें श्रीनगर च सीनियर पार्टी नेताएं दी मौजूदगी च एहू ऐलान कीता। उमर होरें मियां अल्ताफ अहमद हुंदी लोकप्रियता दा जिक्र करदे होई एहू विश्वास बी जताया जे उनेंगी बड़ा मता सैहयोग ते समर्थन मिलोग। हदबंदी दी प्रक्रिया दे बाद हुन अनंतनाग हल्के च राजौरी ते पुंछ जिलें गी शामिल कीता गेदा ऐ ते इस हल्के च लोकसभा चुनाएं दे त्रीये गेड़ तैहत 7 मई गी मतदान होग। त्रीये गेड़ दे चुनांऽ लेई अधिसूचना 12 अप्रैल गी जारी कीती जाग ते नामजदगियां दाखल करने दी खीरी तरीक 19 अप्रैल ऐ।



## BJP-Manifesto Meeting

भारती जनता पार्टी दी चुनांऽ घोषणा पत्र कमेटी दी अज्ज नमीं दिल्ली स्थित पार्टी मुख्यालय च बैठक लग्गी। बैठका च कमेटी नै पार्टी दे चुनांऽ घोषणा पत्र दे बारे च तफसीली सोच विचार कीता। 27 मित्बरी कमेटी दी इस पैहली-पैहली बैठक दी अध्यक्षता बीजेपी दे सीनियर लीडर ते केंद्री मंत्री राजनाथ सिंह होरें कीती। बीजेपी चुनांऽ घोषणा पत्र कमेटी दियां कन्वीनर केंद्री मंत्री निर्मला सीतारमण होर न जिसले जे पीयूष गोयल होरें बी एहूदे सह-कन्वीनर बनाए गेदे न। तोआई कांग्रेस दी बी केंद्री चुनांऽ कमेटी दी अज्ज नमीं दिल्ली च बैठक लग्गी जेदे च लोकसभा चुनाएं लेई तेलंगाना लेई मेदवारें दे नाएं बारै सोच विचार कीता गेआ। मीटिंगै च पार्टी प्रधान मल्लिकार्जुन खड़गे हुंदे अलावा पार्टी दियां सीनियर लीडर सोनिया गांधी, तेलंगाना दे मुख्मन्त्री रेवंथ रेड्डी बी मजूद हे।

